

Захиргааны хэм хэмжээний
актын улсын нэгдсэн бүртгэлд
2024 оны 10 сарын 28-ны
өдрийн 6965 дугаарт бүртгэв.

**ДОРНОГОВЬ АЙМГИЙН ЗАСАГ ДАРГА, ЦАГДААГИЙН
ГАЗРЫН ДАРГЫН ХАМТАРСАН ЗАХИРАМЖ, ТУШААЛ**

2024 оны 10 дугаар
сарын 14-ний өдөр

Сайншанд сум

Дугаар 4/722, 5/220

**Золбин нохой, муурыг хот, суурин газарт галт
зэвсэг ашиглан устгах журам батлах тухай**

Монгол Улсын Засаг захиргаа, нутаг дэвсгэрийн нэгж, түүний удирдлагын тухай хуулийн 60 дугаар зүйлийн 60.1.21 дэх заалт, 66 дугаар зүйлийн 66.1 дэх хэсэг, Галт зэвсгийн тухай хуулийн 11 дүгээр зүйлийн 11.2, 11.3 дахь хэсгийг үндэслэн ЗАХИРАМЖЛАХ, ТУШААХ НЬ:

1.Иргэдийн эрүүл, аюулгүй орчинд амьдрах нөхцөлийг хангах хүрээнд "Золбин нохой, муурыг хот, суурин газарт галт зэвсэг ашиглан устгахад мөрдөн ажиллах журам"-ыг хавсралтаар баталсугай.

2.Журмыг хэрэгжүүлж ажиллахыг Сумдын Засаг дарга нарт, захирамжийн хэрэгжилтэд хяналт тавьж ажиллахыг аймгийн Засаг даргын Тамгын газрын дарга (Н.Хонгорзул)-д тус тус даалгасугай.

3.Энэ журмыг эрх зүйн актын нэгдсэн санд бүртгэгдсэн өдрөөс эхлэн дагаж мөрдсүгэй.

АЙМГИЙН ЗАСАГ ДАРГА

О.БАТЖАРГАЛ

АЙМГИЙН ЦАГДААГИЙН
ГАЗРЫН ДАРГА

Б.БАТЗОРИГ

ХТҮ2523 Т.ХА.ХТҮГ 9025971

Аймгийн Засаг дарга, Цагдаагийн
газрын даргын 2024 оны 10 дугаар
сарын 17-ний өдрийн 9727/542 дүгээр
захирамж, тушаалын хавсралт

ЗОЛБИН НОХОЙ, МУУРЫГ ХОТ, СУУРИН ГАЗАРТ ГАЛТ ЗЭВСЭГ АШИГЛАН УСТГАХ ЖУРАМ

Нэгдүгээр зүйл. Нийтлэг үндэслэл

1.1. Дорноговь аймгийн нутаг дэвсгэрт сумдын Засаг дарга, Засаг даргын Тамгын газраас золбин нохой, муурыг сумын төв, суурин газарт галт зэвсэг ашиглан устгах ажлыг зохион байгуулахтай холбоотой харилцааг энэхүү журмаар зохицуулна.

1.2. Энэхүү журам нь Галт зэвсгийн тухай хууль, бусад холбогдох хууль тогтоомжид нийцсэн байна.

Хоёрдугаар зүйл. Зохион байгуулалт

2.1. Золбин нохой, муур устгах ажлыг зохион байгуулах талаар сумын Засаг дарга шийдвэр гаргана.

2.2. Сумын Засаг даргын гаргасан шийдвэрийг үндэслэн сумын Засаг даргын Тамгын газар, зарим сумдад Захирагчийн ажлын алба устгах ажлыг мэргэжлийн байгууллагатай хамтран зохион байгуулна.

2.3. Устгалыг жилд хоёроос доошгүй удаа, шаардлагатай тохиолдолд тухай бүр зохион байгуулна.

2.4. Устгал зохион байгуулах ажлыг аймгийн Цагдаагийн газарт, шаардлагатай тохиолдолд Тагнуулын байгууллагад мэдэгдэж ажиллана.

Гуравдугаар зүйл. Аюулгүй ажиллагаа

3.1. Иргэд олон нийтэд нохой устгахтай холбоотой мэдээллийг 7 хоногийн өмнө хэвлэл мэдээллийн хэрэгслээр зарлана.

3.2. Устгалын хугацааг тодорхой зааж, иргэдийн аюулгүй байдлыг хангах зохион байгуулалтын арга хэмжээг аймгийн Цагдаагийн газар, сум, багийн Засаг дарга, устгах иргэн, аж ахуйн нэгж хамтран хэрэгжүүлнэ.

3.3. Устгалын явцад аливаа эрсдэл үүссэн тохиолдолд хуулийн байгууллагад шуурхай мэдэгдэх

Дөрөвдүгээр зүйл. Золбин нохой, муурыг устгах иргэнд тавигдах шаардлага

4.1. Золбин нохой, муурыг устгах иргэн нь Галт зэвсгийн тухай хуулийн 9 дүгээр зүйлийн 9.1 дэх хэсэгт заасан 21 нас хүрсэн, иргэний эрх зүйн бүрэн чадамжтай, галт зэвсэг ашиглаж гэмт хэрэг санаатай үйлдэж байгаагүй, галт зэвсэг эзэмших, ашиглах, хадгалах аюулгүй ажиллагааны сургалтад хамрагдаж гэрчилгээ авсан Монгол Улсын иргэн байна.

4.2. Иргэн нь галт зэвсгийн тухай хуулийн 9 дүгээр зүйлийн 9.2 дахь хэсэгт заасны дагуу галт зэвсгээ бүртгүүлж, галт зэвсгийн гэрчилгээ авсан байна.

Тавдугаар зүйл.Талуудын эрх, үүрэг

5.1.Сумын Иргэдийн Төлөөлөгчдийн хурлын эрх, үүрэг

5.1.1.Золбин нохой, муурыг устгах талаар зохион байгуулсан сумын Засаг даргын ажлын тайланг хэлэлцэх, гүйцэтгэлд хяналт тавих;

5.1.2.Сумын Засаг даргын саналд үндэслэн золбин нохой, муур устгах ажилд шаардагдах төсвийг батлах, нохой, муур устгах үнэлгээг тогтоох;

5.2.Сумын Засаг даргын Тамгын газрын эрх, үүрэг

5.2.1.Сумын төв, суурин газрын золбин нохой, муурын судалгааг жил бүр гаргаж, устгах тоог тогтоож, холбогдох мэргэжлийн байгууллага (Мал эмнэлгийн газар, Байгаль орчин, аялал жуулчлалын газар)-д танилцуулах;

5.2.2.Журмын 2.3 дахь хэсэгт заасан үйл ажиллагааг зохион байгуулах;

5.2.3.Сумдын Засаг даргын Тамгын газар, зарим сумдын Захирагчийн ажлын алба нь Галт зэвсгийн тухай хуулийн 9 дүгээр зүйлийн 9.1 дэх хэсэгт заасан шалгуурыг хангасан мэргэшсэн, туршлагатай иргэн эсхүл тэдний оролцоотой баг, хуулийн этгээдийг сонгож, тухайн "Сумын төв, суурин газарт золбин нохой, муурыг галт зэвсэг ашиглан устгах гэрээ" байгуулан золбин нохой, муурыг галт зэвсэг ашиглан устгах ажлыг гүйцэтгүүлэх;

5.2.4.Журмын 5.2.3-т заасан гэрээнд золбин нохой, муурыг устгахад ашиглах галт зэвсэг нь Галт зэвсгийн тухай хуулийн 5 дугаар зүйлийн 5.2-т заасан шалгуурыг хангасан, жил бүр тооллогод хамруулсан, сумыг холбогдох зөвшөөрөл бүхий газраас худалдан авах, аюулгүй байдлыг хангах талаар болон бусад асуудлыг харилцан тохиролцож тусгах;

5.2.5.Гэрээнд заасны дагуу иргэнд устгасан золбин нохой, муур нэг бүрд ногдох мөнгөн урамшууллыг олгох;

5.2.6.Устгасан золбин нохой, муурыг хууль тогтоомжид өөрөөр заагаагүй бол хүн амын суурьшлын бүсээс хол, хогийн цэг, бусад зориулалтын газарт Мал эмнэлгийн хяналтад зөөвөрлөж булж устгах, халдваргүйжүүлэх арга хэмжээ авах;

5.2.7.Устгалын тайланг хагас, бүтэн жилээр гаргаж аймгийн Засаг даргын Тамгын газар, Цагдаагийн газарт тус тус хүргүүлэх;

5.2.8.Золбин нохой, муурыг устгах гэрээ байгуулсан иргэн, хуулийн этгээдийн талаарх мэдээллийг аймгийн Цагдаагийн газарт нэн даруй гарган өгч, аюулгүй байдлын баталгаа, зааварчилгаа авах;

5.2.9.Иргэдэд мэдээлэл хүргэж устгалын цагаар иргэдийн аюулгүй байдлыг хангах талаар хөдөлгөөнийг зохицуулах;

5.3.Багийн Засаг даргын эрх, үүрэг

5.3.1.Багийн нутаг дэвсгэр дэх золбин нохой, муурыг устгуулах саналаа гаргах, хамтран зохион байгуулах;

5.3.2.Золбин нохой, муурын тоо, судалгааг гаргаж сумын Засаг даргын Тамгын газарт хүргүүлж байх

5.3.3.Хууль тогтоомжийн хүрээнд аймаг, сумын Иргэдийн Төлөөлөгчдийн Хурал, Засаг даргын тогтоосон тэжээвэр нохой, муур, амьтны татвар, төлбөр, хураамжийг төлүүлэх ажлыг багийн хэмжээнд зохион байгуулах;

5.4.Цагдаагийн газрын эрх, үүрэг

5.4.1.Аймгийн сумдын төв, суурин газарт галт зэвсэг ашиглан золбин нохой, муурыг устгах ажилд мэргэжил, арга зүйн зөвлөгөө өгөх, журмыг хэрэгжүүлэх ажилд хяналт тавих;

5.4.2.Галт зэвсгийн тухай хуулийн 9 дүгээр зүйлд заасан шаардлагыг хангасан иргэнийг гэрээгээр ажиллуулж буй эсэхэд хяналт тавих;

5.4.3.Иргэн, хуулийн этгээдэд холбогдох хууль тогтоомж болон галт зэвсэг, ангийн хэрэгсэлтэй ажиллах аюулгүй ажиллагааны зааварчилгааг өгч ажиллах, биелэлтэд хяналт тавих;

5.4.4.Иргэн, хуулийн этгээдийн үйл ажиллагаанд шалгалт хийж, илэрсэн зөрчил, дутагдлыг арилгуулах, шаардлагатай гэж үзвэл гэрээг цуцлах саналыг холбогдох байгууллагад хүргүүлэх;

5.4.5.Аймгийн төв, суурин газар (сумын төв)-т галт зэвсэг ашиглан золбин нохой, муурыг устгахтай холбоотойгоор иргэн, аж ахуйн нэгжийн гэрээ, галт зэвсэг, сумны талаарх мэдээлэл бусад шаардлагатай баримт бичигтэй танилцах, шалгах, хяналт тавих;

5.4.6.Иргэн, хуулийн этгээдэд энэхүү журмаар хүлээсэн үүргээ хэрэгжүүлэн ажиллах талаар Мэдэгдэл хүргүүлэх, биелэлтийг тооцох;

5.4.7.Устгалын тайланг хагас, бүтэн жилээр гаргуулан авах;

5.5.Нохой, муур устгах иргэн, хуулийн этгээдийн эрх, үүрэг

5.5.1.Золбин нохой, муурыг устгах ажлыг гэрээ байгуулан гүйцэтгэх, холбогдох санхүүжилт, урамшууллыг авах;

5.5.2.Агнах арга, цаг хугацаа, техник хэрэгслээ орон нутгийн онцлог, нөхцөл байдалд тохируулан зөв сонгох, золбин нохой, муурыг устгах үйл ажиллагааг аюулгүй байдлыг бүрэн хангасан тохиолдолд явуулах,

5.5.3.Устгалтыг зохион байгуулахдаа дуу намсгагчтай дурантай буу ашиглан, иргэд харах боломжгүй байршилд буудлага үйлдэх.

5.5.4.Устгалын ажил явуулахын өмнө нутаг дэвсгэр хариуцсан цагдаагийн байгууллагад биечлэн ирж холбогдох гэрээ, галт зэвсэг, сумны талаарх мэдээлэл (бууны гэрчилгээ, зохих зөвшөөрөл бүхий газраас сум, хэрэгсэл худалдан авсан тухай баримт) бусад бичиг баримтыг танилцуулж, аюулгүй ажиллагааны зааварчилгаа авах;

5.5.5.Агнасан золбин нохой, муурыг цаг тухай бүрд нь хүлээлгэн өгч холбогдох тооцоог хийх, устгалын ажлын тайланг сумын Засаг даргын Тамгын газарт тухай бүр гаргаж өгч байх;

5.6.Иргэний үүрэг

5.6.1.Нохой, муурыг вакцинжуулах, мал амьтнаас хүнд халдварладаг өвчнөөс урьдчилан сэргийлэх арга хэмжээг авах;

5.6.2.Нохой муурыг зэрлэгшүүлэхгүй байх;

5.6.3.Нохой муурыг хараа хяналтад байлгаж, бусдад гэмт хор учруулахгүй байх,

5.6.4.Тэжээвэр амьтан нохой, муурыг хүзүүвчтэй байлгах;

5.6.5.Нохой, муур, мал, тэжээвэр амьтныг тэнэмэл, золбин болгох, хаяж гээхгүй байх,

5.6.6.Золбин нохой, муурын талаарх мэдээллийг сум, багийн Засаг даргад мэдэгдэж байх;

5.6.7.Хууль тогтоомжийн хүрээнд аймаг сумын Иргэдийн Төлөөлөгчдийн Хурлаас тогтоосон тэжээвэр нохой, муур, амьтны татвар, төлбөр, хураамжийг холбогдох хугацаанд нь төлөх;

Зургаадугаар зүйл.Санхүүжилт

6.1.Золбин нохой, муурыг устгах ажилд шаардагдах зардлыг орон нутгийн төсвөөс санхүүжүүлнэ.

Долоодугаар зүйл.Хариуцлага

7.1.Иргэн, хуулийн этгээд гэрээгээр хүлээсэн үүргээ хангалтгүй биелүүлсэн, галт зэвсгээр сум алдаж бусдын амь нас, эрүүл мэнд, эд хөрөнгөд хохирол учруулсан бол холбогдох хууль тогтоомжид заасны дагуу хариуцлага хүлээлгэнэ.

-----oOo-----

МЭДЭЭЛЭЛ ХАРИУЦАГЧ: ХУУЛЬ ЭРХ ЗҮЙН ХЭЛТЭС
ХУУЛЬ ЗҮЙН ЗӨВЛӨГӨӨ, ЭРХ ЗҮЙН МЭДЭЭЛЛИЙН САН ХАРИУЦСАН АХЛАХ МЭРГЭЖИЛТЭН:
Б.ДӨЛГӨӨН УТАС: 99390368